

ԳԻՏԱԿԱՆ ՆՍՏԱՇՐՋԱՆ՝ ՆՎԻՐՎԱԾ ՀԱՅԿԱԿԱՆ ՍՍՀ-ՈՒՄ
1975—1976 ԹԹ. ԴԱՇՏԱՅԻՆ ՀՆԱԳԻՏԱԿԱՆ ԱՇԽԱՏԱՆՔՆԵՐԻ
ԱՐԴՅՈՒՆՔՆԵՐԻՆ

Վերջին տարիներին Հայաստանում զգալիորեն աճել է հնագիտական հետազոտությունների ծավալը: Այժմ աշխատում են շուրջ երեք տասնյակ հնագիտական մեծ և փոքր արշավախմբեր ու ջոկատներ, որոնք կազմակերպված են ՀՍՍՀ ԳԱ հնագիտության և ազգագրության ինստիտուտի և Երևանի պետական համալսարանի կողմից: Ամեն տարի զգալիորեն աճում է հնագիտական նոր ինֆորմացիայի ծավալը: ՀՍՍՀ ԳԱ հնագիտության և ազգագրության ինստիտուտի նախաձեռնությամբ 1977 թ. մայիսի 30-ից հունիսի 1-ը տեղի ունեցավ Հայկական ՍՍՀ-ում 1975—1976 թթ. դաշտային հնագիտական աշխատանքների արդյունքներն ամփոփող գիտական նստաշրջանը՝ նվիրված հայագիտության երախտավոր, պրոֆեսոր Կարո Ղաֆադարյանի հիշատակին, որի ծննդյան 70-ամյակը լրանում է 1977 թ.:

Նստաշրջանը բացեց ՀՍՍՀ ԳԱ հնագիտության և ազգագրության ինստիտուտի դիրեկտոր, ՀՍՍՀ ԳԱ ակադեմիկոս Բ. Ն. Առաքելյանը: Նա նշեց, որ Կարո Ղաֆադարյանը անջնջելի հետք է թողել հայագիտության մեջ: Ղաֆադարյանի վաստակը հատկապես մեծ է չորս բնագավառներում՝ Հայաստանի պատմության պետական թանգարանի ստեղծման և կազմակերպման գործում, պատմական հուշարձանների հաշվառման և պահպանման, միջնադարյան Հայաստանի հնագիտության և, հատկապես, հայկական վիճագրության ասպարեզում:

Կ. Գ. Ղաֆադարյանը շարունակել էր Նիկողայոս Մառի սկսած՝ միջնադարյան Հայաստանի քաղաքների ուսումնասիրությունը: Նրան բախտ է վիճակվել Ս. Վ. Տեր-Ավետիսյանի հետ միասին սկսելու Դվին մայրաքաղաքի պեղումները: Հետագայում նրա ղեկավարությամբ կատարված Դվինի երկարամյա պեղումները ի հայտ են բերել բացառիկ նյութեր, որոնք մեծ նշանակություն ունեն Անդրկովկասի և ողջ Մերձավոր Արևելքի քաղաքային կյանքի պատմության ուսումնասիրության համար: Վիճագրության բնագավառում Կ. Գ. Ղաֆադարյանը ստեղծել է մենագրությունների մի մատենաշար, որը նվիրված է միջնադարյան նշանավոր վանքերին

և նրանց բազմաթիվ մեծարժեք արձանագրություններին: Մեծ է նրա վաստակը նաև հայ վիճագրության «Դիվանի» ստեղծման գործում: Կարո Ղաֆադարյանը պատրաստել է գիտական կադրեր, որոնք հաջողությամբ շարունակում են իր սկսած աշխատանքները:

Նստաշրջանում զեկուցումները ընթերցվեցին ժամանակագրական հաջորդականությամբ: Առաջին օրվա նիստերը նվիրված էին քարի դարի, բրոնզի և վաղ երկաթի դարերի հուշարձանների ուսումնասիրությանը, երկրորդ օրվա զեկուցումները՝ ուրարտական և անտիկ դարաշրջանին, իսկ երրորդ օրվանը՝ միջնադարյան հուշարձաններին: Նստաշրջանին ներկայացվել էր 27 զեկուցում, որոնց թեզիսները նախապես հրատարակված էին:

Բ. Գ. Երիցյանի զեկուցումը՝ «Կացարանները շինության հարցը վաղ քարի դարում», նվիրված էր պալեոլիթի ուսումնասիրության կարեւոր խնդիրներից մեկին: Հնագիտության բնագավառում երկար ժամանակ տիրում էր այն կարծիքը, թե մարդու կողմից բնակարանի կառուցումը սկսվել է վերին պալեոլիթից: Սակայն վերջերս կատարված հետազոտությունները ցույց են տալիս, որ դեռևս հնագույն նախամարդը (հոմո հաբիլիսը) բացօթյա հյուղականման շինույթ է կառուցել: Բնակարանատիպ կառույցներ հայտնի են այժմ աշելյան ժամանակաշրջանից և, ավելի մեծ թվով, միջին պալեոլիթի հուշարձաններից: Հայաստանում միջին պալեոլիթով թվագրվող այդպիսի բնակարանի հետքեր առաջին անգամ են հայտնաբերվել Երեվան—I քարայրի մերձակայքում: Շինույթի մնացորդները մոտ 48 հազար տարեկան են:

Արարատյան դաշտի և այն եզերող նախալեռնային հուշարձանների խումբը մ. թ. ա. III—I հազարամյակներում զեկուցումով հանդես եկավ Է. Վ. Խանգադյանը, որն ամփոփեց իր բազմամյա պեղումների արդյունքները Ջրահովտում, Մեծամորում, Արևիկում, Ոսկեբլրում և Լճափի բլրում: Հնագիտական նյութերը այժմ հավաստում են մշակույթի զարգացումը Արարատյան դաշտում մ. թ. ա. III հազարամյակից մինչև I հազարամյակի սկիզբը և ապա-

ընդունում են Հայկական լեռնաշխարհի՝ մ. թ. ա. XI—IX դդ. հասարակությանը բնորոշ խիստ շերտավորումը:

Երկու զեկուցում նվիրված էր Հայկական լեռնաշխարհի վաղ բրոնզեդարյան մշակույթի (մ. թ. ա. III հազարամյակ) ուսումնասիրության առանձին հարցերին: Ա. Յ. Գևորգյանի զեկուցումը վերաբերում էր Հայկական լեռնաշխարհի մետաղագործության կարևոր հարցերին: Բազմաթիվ առարկաների սպեկտրալ մետալոգրաֆիական անալիզների վիճակագրական մշակումը ցույց է տալիս մ. թ. ա. III հազարամյակում Հայկական լեռնաշխարհի և Գնեստրոնական Անատոլիայի մետաղագործության ընդհանրությունը: Լ. Ա. Պետրոսյանի և Բ. Գ. Նրիցյանի զեկուցման մեջ քննարկվում էին Քեթիի (Շիրակ) վաղ բրոնզեդարյան բնակատեղիի քարե գործիքները:

Երեք զեկուցումներ նվիրված էին միջին և ուշ բրոնզեդարյան (մ. թ. ա. II հազարամյակ) նորահայտ դամբարանային նյութերին, որոնք հայտնաբերվել են Արագածոտնում, Սևանի ավազանում և Լոռիում: Հ. Ն. Սիմոնյանը ներկայացրեց Վերին Նավերի (Աշտարակի շրջան) միջին բրոնզեդարյան դամբարանադաշտի 1976 թվականի պեղումների արդյունքները: Բացվել են ինչպես ժայռափոր փոսերով հիմնահողային, այնպես էլ քարարկղային դամբարաններ: Այս կարևոր հուշարձանը աչքի է ընկնում հայտնաբերված մեծաքանակ գունազարդ խեցեղենով: Հ. Ռ. Խաչայելյանը պատմեց Զուլաբարում կատարված հետախուզական պեղումների մասին, որտեղ բացված դամբարանները պատկանում են մ. թ. ա. II հազ. առաջին կեսին և I հազ. սկզբներին: Ս. Հ. Գևորգյանը հրապարակեց Լոռի-բերդի № 15 դամբարանի նյութերը: Այստեղ կատարված կրկնակի թաղումներից առաջինը թվագրվում է մ. թ. ա. XVII—XIV դդ., իսկ երկրորդը՝ մ. թ. ա. XII—X դդ.: Հայտնաբերված են ուշ բրոնզի դարի բրոնզե քանդակներ, որոնք իրենց կատարելությամբ գերազանցում են Անդրկովկասում գտնված այդ ժամանակաշրջանի առ այսօր հայտնի բոլոր նմանօրինակները:

Տարբեր տիպերի հուշարձաններ ընդգրկող Շամիրամի հուշարձանախմբի (Աշտարակի շրջան) 1975—1976 թթ. ուսումնասիրության արդյունքներին էր նվիրված Դ. Ն. Արեշյանի զեկուցումը: Արշավախումբը Արուճ գյուղի մոտակայքում պեղեց մի դամբարանաբլուր, որտեղ հայտնաբերվել են բրոնզե առարկաներ, ոսկե զարդեր, բազմաթիվ կավանոթներ, ղոհաբերված կենդանիների ոսկորներ: Դամբարանաբլուրը թվագրվում է մ. թ. ա. II հազարամյակի առաջին կեսով: Շամիրամի մ. թ. ա. XI—

IX դդ. վաղ երկաթեդարյան հուշարձանների համալիրը բաղկացած է քաղաք-ամրոցից, գլխավոր դամբարանադաշտից, ջրամբարից, գլխավոր դամբարանադաշտից հարավ-արևելք գրտնըվող պաշտամունքային շինություններից, մեծ կուրգանների խմբից և այլն: Ելիսավոր դամբարանադաշտում պեղվել են տարբեր տիպերի դամբարաններ, որոնք աչքի են ընկնում յուրօրինակ ճարտարապետական ձևերով: Դամբարանների վրա դրված են եղել մահարձաններ, իսկ գերեզմանը արտաքինից եզերող սալերը դարձրված են եղել բարձրաքանդակներով:

Ուրարտուի ժամանակաշրջանի, ինչպես նաև անմիջապես հետուրարտական հուշարձաններին էին նվիրված շորս զեկուցումներ: Կ. Կ. Ղաֆաղաբյանը ճախնական դիտողություններ Արմավիրի միջնաբերդի կառույցների վերաբերյալ զեկուցման մեջ կանգ առավ Արգիշտիխինիլի արևելյան միջնաբերդի ճարտարապետության երեք կարևոր հարցերի վրա: Միջնաբերդի արևմտյան հատվածի ուրարտական շինությունների հատակագծային վերլուծությունը թույլ է տալիս առանձնացնել պարիսպների շինարարության երեք տարբեր ժամանակաշրջաններ: Ամրոցի նախնական կառույցի մոտքը, որը չի պահպանվել, հավանորեն բացված էր հյուսիսային պարսպի մեջ: Միջնաբերդի կենտրոնական մասում գտնվում էր հատուկ նշանակություն ունեցող մի շենք, որից պահպանված առանձին քարեր հնարավորություն են տալիս վերականգնելու այդ կարևոր կառույցի հատվածները:

Ս. Ա. Նսայանի զեկուցումը նվիրված էր Օշականի դամբարանադաշտում հայտնաբերված ուրարտական առարկաներին: Մեծ քանակությամբ իրեր են գտնվել №№ 25 և 59 դամբարաններից: Երկուսի մեջ էլ բացվել են խմբային թաղումներ, կմախքները կծկված վիճակում: Գտնվել են բազմաթիվ ուրարտական կավանոթներ, զարդեր, սկյութական բրոնզե նետասլաքներ և մեկ երկաթե եռանիստ սլաք: Հայտնաբերված առարկաներից առանձնահատուկ ուշադրության են արժանի ուրարտական կավե երկու սալիկներ՝ առյուծների հարթաքանդակ պատկերներով, որոնք երեսապատված են ոսկով: № 59 դամբարանը թվագրվում է մ. թ. ա. VII դարով:

Ռ. Ս. Խնկիկյանը ներկայացրեց Ղափանի շրջանի Շիկահող գյուղի մոտ պեղված № 10 քարարկղային դամբարանի նյութերը, որոնք թվագրվում են մ. թ. ա. VII դարի վերջով և VI դարով:

Գ. Ա. Տիրացյանի «Հին Արմավիրի պեղումները» զեկուցումը ժամանակագրական առումով կապող օղակ հանդիսացավ Ուրարտուի և ան-

տիկ Հայաստանի մշակույթներին նվիրված զեկուցումների միջև: Մ. թ. ա. VIII—VII դդ. շերտը ամփոփում է ուրարտական Արգիշտիի նիլի քաղաքի արևելյան միջնաբերդի ավերակները: Այդ մասում հետազայում կառուցվել է հին հայկական Արմավիրը: 1975—1976 թթ. ըլրի արևմտյան լանջի բարձրագույն մասում բացահայտվել է ուրարտական ժամանակաշրջանի սենյակների մի համալիր, որն իր մեջ պարունակում է անտիկ և միջնադարյան ժամանակաշրջանի շերտեր: Հելլենիստական շերտը առանձնապես հարուստ է միջնաբերդի արևմտյան հատվածում: Այստեղ բացվել են բնակարանների բազմաթիվ ավերակներ, որոնց շերտագրական դիրքը ապացուցում է, որ դրանք պատկանում են հելլենիստական դարաշրջանին: Պեղումներից հայտնաբերվել են հելլենիստական ժամանակաշրջանի բազմաթիվ առարկաներ, որոնց ուսումնասիրությունը ներկայացնում է արտադրության, փոխանակության, կենցաղի և պաշտամունքի պատկերը:

Վերջին տարիների ընթացքում անընդմեջ աճում է հետաքրքրությունը անտիկ Հայաստանի մշակույթի նկատմամբ: Բ. Ն. Առաֆեյանի ղեկուցումը նվիրված էր 1975—1976 թթ. կատարված Հին Արտաշատի պեղումներին: Շարունակվել են VIII և կատարվել են IV բլուրների պեղումները: IV բլուրը, որ Արտաշատի բլրաշարի ամենացածր բարձունքն է, իր կենտրոնական դիրքով մեծ դեր է կատարել մայրաքաղաքի պաշտպանական կոմունիկացիաները ապահովելու գործում: Բլուրը ամրացված էր հզոր պարիսպներով, և այստեղից պարսպապատ նեղ անցումներ են ձգվել դեպի հարևան բլուրները: Այս տեղամասի պեղումները պարզել են նաև պարիսպների հիմքերի ամրացման տեխնիկան: VIII բլրի վրա հայտնաբերված մնացորդները թվագրվում են մ. թ. ա. II դարից մինչև մ. թ. IV դարը: Այստեղ բացահայտվել են շինարարական չորս շերտեր: Պեղումների ընթացքում բացվել են կավագործական արհեստանոց՝ թրծելու հնոցով, հասարակական բաղնիք, ավազաններ: Հայտնաբերվել են մշակույթի զանազան առարկաներ, այդ թվում նաև ներմուծված իրեր:

Ընդամենը մի քանի տարի առաջ անտիկ ժամանակաշրջանի մշակույթը Սովետական Հայաստանի տարածքում հիմնականում հայտնի էր հին Հայաստանի մայրաքաղաքներ Արտաշատի, Արմավիրի, Վաղարշապատի և արքունի ամառանոց Գառնիի պեղումներից: Այժմ սկսվել է նաև գյուղական միջավայրում գոյություն ունեցած անտիկ բնակավայրերի հնագիտական ուսումնասիրությունը: Բ. Ա. Կառապետյանի ղեկուցումը նվիրված էր Կարճաղբյու-

րի պեղումներին: Սեանա լճի հարավային ափին գտնվող այս պարսպապատ բնակավայրում պեղվել են կանոնավոր հատակագծով մեծ շահսերի սենյակներ: Հայտնաբերված նյութերը թվագրվում են մ. թ. ա. VI—II դդ.: Ֆ. Լ. Տեր-Մաքսիմովը պատմեց Դիտակում և Տաճարաբակում իր կատարած հետախուզական պեղումների մասին: Դիտակի հնավայրը, որ ուշանտիկ ժամանակաշրջանով է թվագրվում, գտնվում է Արտաշատի շրջանի համանուն գյուղի մոտ: Պեղումների ընթացքում բացահայտվել են կիսակլոր աշտարակներով պարիսպների հիմքեր, բնակելի շինություններ: Արմավյանի շրջանի Զորաղբյուր գյուղի մոտ գտնվող Տաճարաբակ բնակավայրը բազմաշերտ հուշարձան է, որը ընդգրկում է ամբողջությամբ անտիկ ժամանակաշրջանը, սկսած մ. թ. ա. VI դարից:

Միջնադարյան Հայաստանին նվիրված զեկուցումների շարքը սկսվեց Խ. Ա. Մուշեղյանի «Հայաստանում և Աղվանքում VIII—IX դդ. տարածված դրամների մասին» հաղորդմամբ: Օմայյան հարստության արաբական դրամները տարածվել են Հայաստանում և Աղվանքում VII դարի վերջից և VIII դարի սկզբից: Այդ դրամները թողարկվել են ինչպես խալիֆայության կենտրոնական նահանգներում, այնպես էլ Հայաստանում (Դվին քաղաքում) և Աղվանքում (Պարտավում): Հայկական լեռնաշխարհի կենտրոնական և հյուսիս-արևելյան երկրամասերի ու Աղվանքի միավորումը վարչական մեկ՝ Արմինիա նահանգում արտացոլված է եղել տեղում կտրված դրամների վրա միևնույն իշխանական անունների հիշատակություններով: Թողարկվել են պղնձե և արծաթե դրամներ արաբական իշխանությունների կողմից սահմանված միասնական սիստեմով: Մինչև VIII դարի կեսերը տեղական դրամները սակավաթիվ են, դրանց զանգվածային թողարկումը սկսվում է Աբբասյանների հաստատման ժամանակաշրջանից: Հայաստանում և Աղվանքում կտրված դրամների հայտնաբերումը նվազապես ապացուցում է նրանց առկայությունը սլավոնական և գերմանական շուկաներում՝ արաբական միջազգային առևտրի ազդեցության հետևանքով:

Միջնադարյան հուշարձաններ ներկայացնող զեկուցումների մի խումբ նվիրված էր Հայաստանի մայրաքաղաք Դվինին, մյուսները՝ վանական համալիրներին և մեկ զեկուցում՝ ամրոցներին: Դվինի 1975—1976 թթ. պեղումները արդյունքները ընդհանրացնող զեկուցումով հանդես եկավ Խ. Ա. Քալանթարյանը: Դվինի միջնաբերդից արևելք հայտնաբերվել են քարե մարդակերպ երկու արձաններ, որոնցից մեկը հանդերձանքով զինվորի է պատկերում, մյուսը՝

մյնոջ: Նույն վայրից հայտնաբերվել են անտիկ ժամանակաշրջանի ճարտարապետական բեկորներ: Քաղաքի կենտրոնական թաղում բացվել են հնագույն կաթողիկոսարանի ավերակները: Նրա միջուկն էր հանդիսանում սյունաշարի մեծ դահլիճը, որտեղ պահպանվել են մոնումենտալ խարիսխներ: Պալատը, կառուցված լինելով V դարի 70-ական թթ., գոյություն է ունեցել մինչև VI դարի 70-ական թթ.: VII դարի առաջին տասնամյակներում, կաթողիկե եկեղեցու կառուցման ժամանակ, պալատի ավերակների տեղը վեր է ածվել շինարարական հրապարակի, իսկ IX դարում այդ տարածքը ինտենսիվ կերպով կառուցապատվել է: Միջնաբերդի ստորին մասում պեղվել է ամրոցի մի փոքր հատված, որը երկու կողմից կառուցապատված է եղել XII—XIII դդ. շենքերով: Այստեղ հայտնաբերվել են բազմաթիվ առարկաներ, դրամներ:

ՀՍՍՀ ԳԱ թղթակից անդամ Ա. Ա. Կուսաանյանի և Ա. Ա. Քալանթարյանի «Ապակու արտադրության հետքեր վաղ միջնադարյան Դվինում» զեկուցումը նվիրված էր Հայաստանի այդ ժամանակաշրջանի արհեստի կարևոր ճյուղերից մեկին: Կենտրոնական թաղամասում V—VI դդ. կաթողիկոսական պալատի տեղում հայտնաբերվել են VII դարի ապակեգործական արհեստանոցի հետքեր: Այստեղ գտնվել են աղյուսե վառարաններ, ապակե անոթների խոտան, ապակե դանգվածների բեկորներ, լուսամուտի ապակիներ, հալոցներ և այլն: Հայտնաբերված ապակու քիմիական և սպեկտրալ անալիզները ցույց են տալիս, որ այն արտադրվել է սույն արհեստանոցում, տեղական հումքի օգտագործմամբ:

Սրեք զեկուցում նվիրված էր Դվինի առանձին տեղամասերի պեղումներով բացահայտված համալիրներին, առարկաների առանձին խմբերին, Ա. Ս. Փամկոչյանի զեկուցումը ներկայացրեց Դվինի ստորին բերդի պեղումները: Ֆ. Ս. Բարալյանը պատմեց ստորին բերդում բացված արտադրական համալիրի մասին: Ն. Գ. Հանդրյանը հրապարակեց Դվինում վերջին տարիների

պեղումներից հայտնաբերված մետաղե առարկաների հարուստ ժողովածուն:

Ս. Վ. Հաբուքյունյանի զեկուցումը նվիրված էր Մարմաշենի պեղումներին և, հատկապես, այստեղ գտնված միջնադարյան երկու ամրոցների ուսումնասիրությանը: Մարմաշենի ձորում մշակույթի վաղագույն հուշարձանները թվագրվում են մ. թ. ա. III հազարամյակով, սակայն այդ շրջանի բնակավայրերի ծաղկման ժամանակաշրջանը միջնադարն է: Հայտնաբերվել են վաղ միջնադարյան երկու փոքր եկեղեցիներ և մի քանի ուրիշ եկեղեցիներ, որոնք թվագրվում են X—XII դդ.: Առավել ուշագրավ են X դարում կառուցված Վահրամաբերդ և Տիրաշեն ամրոցները, որոնք հյուսիսից պաշտպանում էին Անի մայրաքաղաքը: Դրանք սկզբունքորեն միատիպ կառույցներ են, որոնց հատակագծային լուծումը նորություն է միջնադարյան ամրոցաշինության պատմության մեջ:

Միջնադարյան Հայաստանի վանական համալիրների ուսումնասիրությունը սերտորեն կապված է վիճաբանական հետազոտությունների հետ: Գ. Մ. Գրիգորյանը, հանդես գալով «Վահանավանքի դամբարանատան նորահայտ արձանագրությունները» զեկուցումով, վիճաբոր նյութեր հրապարակեց Սյունիքի XI դարի հոգևոր մշակույթի այս կարևոր օջախի պեղումներից: Հայտնաբերված արձանագրություններում հիշատակված են Սյունիքի և Աղվանքի նշանավոր գործիչների անուններ, նրանց կյանքին ու գործունեությանը վերաբերող տարեթվեր: Գ. Գ. Սարգսյանի զեկուցումը նվիրված էր մինչև այժմ մասնագետների կողմից չուսումնասիրված Գհուկի վանքի արձանագրություններին (վանքը գտնվում է Հրազդանի շրջանի Արղական գյուղից 3—4 կմ հյուսիս): Վանքի գործունեության շրջանը, ըստ զեկուցողի, տևել է XIII դարի սկզբից մինչև XIV դարի կեսերը: Բազմազան և հետաքրքիր բովանդակությամբ արձանագրությունները պահպանել են նաև վանքի իսկական անունը՝ Բոլորահաղ:

Գ. ԱՐԵՇՅԱՆ

ՄԻՋՆԱԴԱՐՅԱՆ ԵՐԳԱՐՎԵՍԻ ԵՐԿՈՒ ՆՈՐԱՀԱՅՏ ԲԵԿՈՐ

Հայ միջնադարյան երաժշտական մշակույթի զգալի մասը հասել է մեզ բանավոր և գրավոր ավանդույթի շնորհիվ, պահպանվել հայ արվեստի և գիտության երախտավորների ջանքերով: Միջնադարյան երգարվեստի բազում նմուշներ այսօր էլ գեղադիտական հաճույք են պատճառում, գրավում են հայ կոմպոզիտորներին:

Րից շատերի ուշադրությունը, յուրատեսակ արտահայտություն գտնելով նրանց ստեղծագործության մեջ:

Սակայն այդ նմուշների առավել զգալի մասը ցրված է աշխարհով մեկ կամ կորսված է ու մոռացված: Նրբեմն միայն, դեպքից դեպք, մեզ են հասնում այդ մշակույթի առանձին պատա-